

UNITED NATIONS



NATIONS UNIES

INTERNATIONAL CRIMINAL
TRIBUNAL FOR THE FORMER
YUGOSLAVIA

TRIBUNAL PÉNAL INTERNATIONAL
POUR L'EX-YOUGOSLAVIE

CHURCHILLPLEIN 1, P.O. BOX 13888
2501 EW THE HAGUE, THE NETHERLANDS
TELEPHONE: +31 70 512-5000
FAX: +31 70 512-8637

CHURCHILLPLEIN 1, B.P. 13888
2501 EW LA HAYE, PAYS-BAS
TELEPHONE: +31 70 512-5000
FAX: +31 70 512-8637

Tužilac protiv Stojana Župljanina
Predmet br. IT-08-91-T

**JAVNO
ODLUKA**

ZAMJENIK SEKRETARA SUDA,

IMAJUĆI U VIDU Statut Međunarodnog suda, koji je Savet bezbednosti usvojio Rezolucijom 827 (1993.), a posebno član 21 Statuta;

IMAJUĆI U VIDU Pravilnik o postupku i dokazima, koji je Međunarodni sud usvojio 11. februara 1994. godine, s naknadnim izmenama i dopunama (dalje u tekstu: Pravilnik), a posebno pravila 44 i 45 Pravilnika;

IMAJUĆI U VIDU Uputstvo za dodjelu branioca po službenoj dužnosti, koje je Međunarodni sud usvojio 28. jula 1994., s naknadnim izmjenama i dopunama (dalje u tekstu: Uputstvo), a posebno članove 16(B) i (C) i 20 Uputstva;

IMAJUĆI U VIDU Profesionalni kodeks branilaca koji postupaju pred Međunarodnim sudom (IT/125 REV.2) (dalje u tekstu: Profesionalni kodeks);

IMAJUĆI U VIDU da je g. Stojan Župljanin (dalje u tekstu: optuženi) 21. juna 2008. doveden u sjedište Međunarodnog suda i da je njegovo prvo stupanje pred Sud održano 23. juna 2008., kao i da je njegovo daljnje prvo stupanje pred Sud održano 21. jula 2008.;

IMAJUĆI U VIDU da je 23. juna 2008., kako bi zaštitio prava optuženog na osnovu Statuta, Pravilnika i Uputstva, zamjenik sekretara imenovao g. Tomislava Višnjica, advokata iz Srbije, za njegovog dežurnog branioca u skladu s pravilom 62(B) Pravilnika, za potrebe njegovog prvog stupanja pred Sud i u vezi sa svim drugim pitanjima koja bude potrebno riješiti do dodjele stalnog branioca;

IMAJUĆI U VIDU da je optuženi, u skladu sa članom 8 Uputstva, podnio zahtjev za pravnu pomoć o trošku Međunarodnog suda na osnovu toga što nema dovoljno sredstava da plati branioca i zatražio od Sekretarijata da mu kao stalnog branioca dodijeli g. Višnjica;

IMAJUĆI U VIDU da je zamjenik sekretara 18. jula 2008. imenovao g. Višnjića za branioca optuženog na privremenoj osnovi u skladu sa članom 11(B) Uputstva, kako bi se obezbijedilo da pravo optuženog na branioca ne bude ugroženo dok Sekretarijat ispituje njegove mogućnosti da sam plaća branioca, a poslije toga dvaput, 19. novembra 2008. i 3. aprila 2009., produžio njegovo privremeno imenovanje na period od 120 dana;

IMAJUĆI U VIDU da je sekretar 18. avgusta 2009. povukao imenovanje g. Višnjića kao glavnog branioca na osnovu člana 20 Uputstva, umjesto njega imenovao g. Pantelića za glavnog branioca optuženog i imenovao g. Krgovića za kobranioca, i da je odluka stupila na snagu tog dana;

UZIMAJUĆI U OBZIR da je optuženi 4. februara 2010. zatražio da g. Pantelić i g. Krgović zamijene funkcije i da je, nakon dopisa koji je Sekretarijat uputio 9. februara 2010. i odgovora optuženog 11. februara 2010., Sekretarijat 17. februara 2010. odbio zahtjev na osnovu toga što optuženi nije iznio dovoljno argumenata;

UZIMAJUĆI U OBZIR da je 31. marta 2010. optuženi ponovo zatražio od Sekretarijata da odobri zamjenu funkcija njegovih branilaca i da su kasnije i g. Pantelić i g. Krgović zatražili zamjenu funkcija u timu odbrane optuženog i da su za to naveli razloge u dopisu od 14. maja 2010. godine;

UZIMAJUĆI, osim toga, **U OBZIR** da su 17. juna 2010. g. Pantelić i g. Krgović dostavili pismene garancije Sekretarijatu, potvrdivši da zatražena zamjena funkcija glavnog branioca i kobranioca, ako bude odobrena, neće uzrokovati nikakvo odgađanje sudskog postupka, da će interesi optuženog biti u potpunosti zaštićeni i da to neće uticati na rad tima odbrane;

UZIMAJUĆI U OBZIR da su i g. Pantelić i g. Krgović na spisku branilaca po službenoj dužnosti Međunarodnog suda koji stoje na raspolaganju za dodjelu osumnjičenima i optuženima slabog imovnog stanja na osnovu pravila 45 Pravilnika;

UZIMAJUĆI U OBZIR da je g. Krgović trenutno dodijeljen za glavnog branioca u predmetu protiv g. Milana Gvere (IT-05-88) pred ovim Međunarodnim sudom;

IMAJUĆI U VIDU da na osnovu člana 16(G) Uputstva, nijedan branilac ne može biti dodijeljen za odbranu više od jednog osumnjičenog ili optuženog istovremeno, osim ako svaki optuženi dobije nezavisni pravni savjet od sekretara Suda i ako svaki da pismenu saglasnost za to i ako se sekretar Suda uvjeri da ne postoji potencijalni sukob interesa ili rasporeda i da dodjela ne bi na drugi način nanijela štetu odbrani bilo kog optuženog ili integritetu postupka;

UZIMAJUĆI U OBZIR da je Presuda u predmetu protiv g. Gvere izrečena 10. juna 2010., g. Gvero je osuđen na 5 godina zatvora i 28. juna 2010. mu je odobreno prijevremeno puštanje na slobodu;

UZIMAJUĆI U OBZIR da žalbeni postupak protiv g. Gvere još nije počeo i da strane u postupku mogu do 8. septembra 2010. da podnesu najave žalbe u ovom predmetu;

UZIMAJUĆI U OBZIR da je, u slučaju da u predmetu protiv g. Gvere bude pokrenut žalbeni postupak, g. Gvero obavijestio Sekretarijat da želi da g. Krgović ostane njegov glavni branilac;

UZIMAJUĆI U OBZIR da je 25. maja 2010. g. Gvero dao pismeno odobrenje da g. Krgović bude dodijeljen optuženom za glavnog branioca, ali je takođe istakao i svoju želju da ga g. Krgović zastupa u svojstvu glavnog branioca ako žalbeni postupak bude pokrenut u ovom predmetu;

UZIMAJUĆI U OBZIR da je 15. jula 2010. g. Krgović dostavio svoj pismeni podnesak u vezi s eventualnim ili stvarnim sukobom rasporeda koji bi nastao zbog njegovog postupanja u svojstvu glavnog branioca g. Gvere u slučaju žalbenog postupka protiv g. Gvere, te da je sekretar zadovoljan dostavljenim informacijama;

OVIM ODLUČUJE, na osnovu člana 20 Uputstva, da povuče imenovanje g. Pantelića kao glavnog branioca, da g. Krgovića dodijeli kao zamjenu na položaj glavnog branioca optuženom i da ponovo imenuje g. Pantelića za kobranioca, pri čemu ova odluka stupa na snagu datumom donošenja.

/potpis i pečat na originalu/
Ken Roberts,
zamjenik sekretara

Dana 23. jula 2010.
U Hagu,
Nizozemska